



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

Parlamentu Nasionál

05 Abríl 2019

Komisaun A PN konsidera rekomendasaun JSMP balun iha Projetu Lei Anti-Korrupsaun

Hahú hosi 26 to'o 29 Marsu 2019, JSMP akompania Komisaun A Parlamentu Nasionál (PN) ne'ebé halo hela diskusaun no aprovasaun iha votasaun espesialidade ba dokumentu "Testu Subtitutivu Projetu Lei nú. 1/V/1^a – Lei Anti Korrupsaun ne'ebé halao iha Lauhata Beach, Munisípiu Likisa no kontinua iha salaun Komisaun A PN.

Iha diskusaun ba projetu lei refere iha kapitulu I hosi estrutura projetu lei ne'e nian, deputadu sira desidi atu konsidera rekomendasaun JSMP nian ne'ebé husu atu tau kapitulu I kona-ba "Dispozisaun Jerál" ne'ebé defini objetu no ambitu inklui definisaun sira kona-ba termu-legál sira atu fasilita operadores justisa sira nia servisu no bele evita interpretasaun ne'ebé ámbigu ba konseitu ka termu sira ne'e bainhira aplika..

"JSMP agradese Komisaun A PN tamba konsidera ona JSMP nia pareser ne'ebé JSMP hato'o ona iha audiénsia no workshop ida-ne'ebé Komisaun A organiza iha semana sira antes", dehan Diretór Ezekutivu JSMP, Luis de Oliveira Sampaio.

JSMP rekomenda ba Komisaun A no Parlamentu Nasionál hanesan órgaun ne'ebé reprezenta povu atu konstinua nakloke-an ba sosiedade sivíl sira hodi rona hanoin no perspetiva sosiedade sivíl nian iha servisu lejislasaun nian hanesan meius ida atu inkoraza partisipasaun públiku iha prosesu halo lei sira.

Proposta alterasaun ba Testu Subtitutivu Projetu Lei nú. 1/V/1^a – Lei Anti Korrupsaun ne'ebé hetan ona aprovasaun iha votasaun espesialidade hamútuk 8 no proposta hirak ne'e mak hanesan; Proposta nú. 1 Kapitulu I Dispozisaun Jerál nian, Proposta nú. 13 artigu 1 kona-ba objetu, Proposta nú. 3 artigu 2 kona-ba Definisau de Ajente, Proposta nú. 4 artigu 3 kona-ba Responsabilidade ba pesoa kolektiva, Proposta nú. 5 artigu 4 kona-ba Responsabilidade tanba atuaun ho ema seluk nia naran, Proposta nú. 6 artigu 5 kona-ba kompartisipasaun krimínál, Proposta nú. 7 artigu 6 kona-ba Espesialidade no Proposta nú. 8 artigu 7 kona-ba Tentativa no Dezisténsia.

Proposta ne'ebé retira hosi deputadu sira durante diskusaun no aprovasaun iha votasaun espesialidade ne'e hamutuk 2 tanba proposta rua ne'e deputadu sira konsidera seidakomoda hotu hanoin sira iha lei refere no proposta rua ne'e mak hanesan proposta proposta nú. 2 kona-ba artigu 1 kona-ba objetu no Proposta nú. 9 artigu 8 kona-ba Imputasaun subjativa.



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

JSMP hanoin katak Parlamentu Nasionál presiza tempu adekuaudu atu esplora, elobora, analiza no ezamina proposta no sujestaun sira ne'ebé maihosi kompenente sira inklui sosiedade sivil. Ida-ne'e importante atu asegura katak provizaun importante sira “inrikesimentu ilísitu, fraude iha konstrusaun, konflitu interese, korupsaun ne'ebé envolve pesoa-koletiva, inklui gratifikasaun atu prevene no kombate korrupsaun bainhira tama ona iha vigor.

Atu hetan informasaun liután favor kontaktu direktamente:

Luis de Oliveira Sampaio
Diretór Ezekutivu JSMP
E-mail: luis@jsmp.tl